

摘藻堂四庫全書薈要

集部

欽定四庫全書薈要

集部

雞肋集卷一  
一至三

詳校官助教臣謝登雋



欽定四庫全書薈要

雞肋集目錄

卷一

古賦

卷二

古賦

卷三

辭



卷四

古詩

卷五

古詩

卷六

古詩

卷七

古詩

卷八

古詩

卷九

古詩

卷十

古詩

卷十一

古詩

卷十二

古詩

卷十三

古詩

卷十四

古詩

卷十五

律詩

卷十六

律詩

卷十七

律詩

卷十八

律詩

卷十九

絕句

卷二十

絕句

卷二十一

絕句

卷二十二

絕句

卷二十三

挽辭



卷二十四

上書

卷二十五

罪言

卷二十六

河議

卷二十七

雜著

卷二十八

雜著

卷二十九

記

卷三十

記

卷三十一

記

卷三十二

銘贊

卷三十三

題跋

卷三十四

序

卷三十五

序

卷三十六

離騷序

卷三十七

策問

卷三十八

策問

卷三十九

策問

卷四十

春秋雜論

卷四十一

春秋雜論

卷四十二

西漢雜論

卷四十三

西漢雜論

卷四十四

西漢雜論

卷四十五

唐舊書雜論

卷四十六

唐舊書雜論

卷四十七

唐舊書雜論

卷四十八

唐舊書雜論

卷四十九

唐舊書雜論

卷五十

五代雜論

卷五十一

書

卷五十二

書

卷五十三

奏狀

卷五十四

表

卷五十五

表



卷五十六

啓

卷五十七

啓

卷五十八

啓

卷五十九

啓

卷六十

祭文

卷六十一

祭文

卷六十二

傳行狀

卷六十三

墓表

卷六十四

墓誌銘

卷六十五

墓誌銘

卷六十六

墓誌銘

卷六十七

墓誌銘

卷六十八

墓誌銘

卷六十九

釋氏贊疏

卷七十

釋氏贊疏

臣等謹案雞肋集七十卷宋晁補之撰補之

字无咎鉅野人元豐間進士元祐中除校書

郎紹聖初落職監信州酒稅大觀中知泗州

卒於官初蘇軾通判杭州補之隨父端友宦  
於杭軾見所作七述大嘆賞之由是知名與  
黃庭堅張耒秦觀為蘇門四學士耒嘗言補  
之自少為文即能追考屈宋班揚下逮韓柳  
之作促駕力鞭務與之齊而後已晚歲自訂  
所作名雞肋集宣和以前避蜀黨秘不傳紹  
興中其從弟謙之始編次為七十卷刊於建

陽云乾隆四十二年八月恭校上

總纂官臣紀昀臣陸錫熊臣孫士毅

總校官臣陸費墀

雞肋集原序

雞肋集左朝奉郎秘書省著作郎充秘閣校理國史編修官濟北晁補之无咎自名其所為詩文也夫物有質者必有文文者質之所以辨也古之立言者當之平居論說諷詠應物接事不能無言非虎豹犬羊之異也食之則無所得棄之則可惜其雞肋乎故裒而藏之謂之雞肋集元祐九年二月旦日序

欽定四庫全書薈要卷一萬五千二百六十八

集部

雞肋集卷一

宋 晁補之 撰

古賦四首

求志賦

釋求志附

幼余不自知蠢兮願求古人而與之游高平邑於大野  
兮魯東鄙而北鄒固余心其惻款兮求前聖又不遠豈  
無鄰莫可與謀兮治邠氏而俗泮幽離房誠不忍兮棄



此而莫能歲執徐之青陽兮余先子乎東征橫武林之  
大江兮睚眦始寧之南邑路會稽以周流兮求歷山之所  
在昔封嶠之世守兮以後夫而致刑越懲恥於夫椒兮  
進樵女而抑心懿二臣以國霸兮卒焉異夫出處行東  
薪而自言兮妻不忍而求去助申威於司馬兮卒隕聲  
以淮南旰訴死於娑娑兮悲綽約之亦殲彼章陳之詭  
嘯兮既睟眊於甲夜何仲御之清激兮而亦云駭夫觀  
者紛回穴其莫識兮泮千載而迹陳思苗山猶若茲兮

又何悲乎曲水惟鄭公之志約兮逢神人焉靡求山岬  
崕而谷紆兮風瀏瀏乎旦莫耿吾何不可畱此土兮竊  
悲越人之機豈其食鮭而化音兮無所用吾之綏冬矇  
矇其多雨兮夏瘴熱以生蠹溪水之淺深兮舟上下而  
擊石吾遵夏蓋之山兮聊以觀乎遠海吾先子之初服  
兮羌董道而不改小人之有心兮猶不假器末余從於  
東安兮依哲人而聞誼蜀蘇子之有廬兮漢遺化而多  
儒往者其不可及兮曷不從子之廬朝余食乎山中夕

余宿乎江上悲世俗之近市兮余安能忍而與之皆往  
余令樓季為右兮使王陽前余世解纜而馳石兮緬余  
得此坦塗良吾輒使環潏兮密吾牙使樸屬攬九州而  
顧懷兮夫安知余力之不足邁余生之罹閔兮歸將母  
乎故都伏里門而畏鄰兮幽獨守此四隅時命大謬兮  
吾迂迂欲何之慨永夏之宜養兮霜凜然其萃之增歔  
歔以啜泣兮殺身其安可字摧榮而藩穴兮雀鼠去而  
不舍惜四序之不淹兮春藹藹其既菲攬卉木猶若茲

兮吾獨不聊此時悲予仲之婉孌兮饒其心以詩禮吾  
不能操贏而坐閭兮耘東山而自食歲旱暵而不雨兮  
螟又生余之場屬歲秋之有穀兮河出墳而湯湯於陵  
子之終褊兮井上李其猶飽服芬芳而潔腹兮夫豈不  
足以忘老衆傑虢而好朝兮咸得時而的皪持衣裘而  
鬻暑兮余固知余賈之不售思遐舉而莫從兮心紆軫  
而盡傷訊黃石以吉凶兮基十二而星羅曰由小基大  
兮何有顛沛既非初志之敢期兮曾何以知其所繫類

清濟以去垢兮芝九莖而為華宵倚楹而悲詫兮疇獨  
憂余之無家蕭苑候之慷慨兮孰云非食之故濟澶淵  
之靈津兮橫中流而颺怒思城闕之挑達兮勉踵夫昔  
之人羿之志於穀兮亦反求夫余身小人不知學禮兮  
畏罪罟之所尋宋七世之炳靈兮皇純佑此下土舉賢  
而授能兮哀莞獨此黎庶牧羊而肥兮式亦用夫有聞  
辟雍之洋洋兮宇干日而糾紛連衽以成雲兮汗而為  
雨豈余不足於同門兮獨惆悵而延佇先事而後得兮

惟其食者之責舉九鼎於鯢淵兮亦人假夫一臂余張  
子之好脩兮蹇博大而無朋雪霏霏而宇凍兮松栢不  
改其青固黃子嘗語余兮曰此是為明月雖工師不以  
佩兮保厥美亦未艾彼喔咿為已甚兮羌浮石而沈木  
子雲之好思兮亦衆諄其寂寞虞氏之為政兮舉五臣  
而與言彼霖霖之射谷兮何足以容江潭之鱣衆不察  
余之情兮求余初猶未沫超孤舉而遠尋兮唯夫不足  
而論世良恫韓而成漢兮皓保惠而悟高成功則去兮

曾何足以介其一毛躬行既卒驕兮禹服義亦太靡  
陳輜車與乘馬兮桓榮亦首乎富貴蕃居室其不理兮  
滂之志以四海允膺之激烈兮羌不以生而昧義意豈  
弟神所嘏兮固何以罹此之不祥豈其莫忍鄰之捽兮  
紛救鬪而得傷嘉林宗之善裁兮要成敗以不失寧遵  
不知時之可為兮行漁瀨以畢世喟嵇康之蹈盡兮愧  
孫子其安補阮清舌而咎目兮潛固自識而遠去謂道  
不可為兮為者敗之衆窳然咸不留兮惟至人焉在之

泮千祀而語鄰兮孰與至人之服意神龍之乘雲兮吾  
欲從焉以足士生各有遇兮吾何為侘傺乎此時曾藿  
菽不足以化兮求余身其庶幾滋蘭以旨蓄兮菊以為  
糗修忠信以抑躁兮夫安知余時之後圖前聖吾永賴  
兮攬百子與竝興時翱翔於道與兮歷年歲以為娛

釋求志

求志自敘也予從先人寓鉅野又從先人仕會稽又從  
先人仕杭余仕於澶仕於魏而後仕於太學故求志所



叙如此高平邑於大野謂高平鉅野縣也魯人好文學而獨邴氏以治富魯人所以去文學趨利者以邴氏故也是見地理志貨殖傳離房別房也揚雄云芳酷烈而不聞兮不如襞而幽之離房武林餘杭也始寧上虞也歷山舜所耕也封嵎防封氏禹執而戮之者也夫椒吳所棲勾踐之山而西施蓋樵家女二臣大夫種范蠡信威司馬者嚴助也曹娥父名盱章陳云者章丹陳珠二女巫夜祠詭嘯夏統見而驚走者也而仲御亦嘗見賈

充叩舷吳歌致風雲予怪之仲御夏統字也苗山即會稽山曲水永和諸君所集處鄭弘遇神人於若耶溪云願旦南風莫北風夏蓋上虞海旁山名自此以上上虞事東安杭州新城也予始見睂山蘓公於杭故云未予從於東安兮依哲人而聞誼樓季古善御者王陽不馳九折坂者也予自謂至此乃知學之所趨猶出荆棘險阻得大塗而思驚也環滸樸屬考工治車說車君子之器車工而後可以致遠君子修而後可以涉世自此以上

新城事將母故都予喪先人歸濟時也予仲無數也東  
山濟東郭予所田處比二年不雨河決卒不穫於陵子  
於陵仲子也傑僂猶參差見甘泉賦趣市者平旦側肩  
爭門而入日莫之後掉臂而不顧故云衆虎豕而好朝  
謂干時者也世所用卜靈柩者曰是為黃石書始予免  
喪占之繇曰由小至大無有顛沛予自謂非予志所期  
也類清濟而以芝為華以況余不敢汙以干時倚楹魯  
漆室女中宵悲嘯鄰人疑其欲嫁者也蕭望之嘗為小

苑東門候自謂各從其志予莫之澶淵予為掾時事挑  
達予教授北京時事予去北京為太學正故曰辟雍之  
洋洋鯢桓九淵名舉鼎九淵非一臂力然一臂亦有助  
也張子予太學同舍文潛也文潛不苟合於人黃魯直  
為明月篇遺之曰天地具美兮生此明月陞白虹兮貫  
朝日予愛之浮石沈木無是道也而誣善者其言嘗類  
此大才而小使之譬霖霖非鱸所游也求斯世而莫予  
知也則思古人焉孟子所謂是以論其世也故曰惟夫

不足而論世自恫韓成漢至潛固自識而遠去皆論世之事也馬融張禹驕靡桓榮以車馬夸弟子皆不足言陳蕃范滂王允李膺李固以忠殺身亦可傷矣夫惟無心於為者為能為天下張良四皓所以成也知其不可而不為則若林宗淵明可矣有光武而嚴陵去之非也遵陵也阮籍在晉人中頗能自濁口不臧否人物而為青白眼殆矣故曰阮青舌而咎目也餘子搶攘小人之中如捧土救河潰卒與之俱溺豈不痛乎故曰為者敗

之懲數子之為而敗而不知時之可為又蔽矣而予又不足為也故終欲求之予身

夢覲賦

歲闕逢之泥灘兮前日至而匪思夢啾耳之甕甕兮翁青蠅其和楮咸南徙而未逝兮遺其矢如散絲余俛避而不汙兮一媼背之淋漓脰不知其可穢兮偶竝趨於西帷媼左目之穴枯兮萍四五其萃之旁兩媼之無言兮亦依帷而靡期朝怛寤而自診兮營營發詩而可知

蹇俱翔而遺矢兮技止此其奚為惟一盲而兩默兮與  
目蒞為何機豈眇視不足與明兮蒞非寄而終離羌何  
為而朕此兮神無心而罔私拜受神祥兮編之冊詞文  
女三之為姦兮比匪人而惡之微夫周公之為見兮迂  
若此其余衰欲徼福則安敢兮問故老其增疑苟不污  
為已免兮謝三媼之難知

坐愁賦

并序

魯人閻子仲武行年七十四躬耕於鄙歲旱不入而色

藜藿促鼓其琴作坐愁之聲嘗所與游晁子補之恐其傷也為作坐愁賦假翁與過者語以解之其詞曰

彼何人而處廓兮匪三閭而獨醒鬢毛毯其雪糝兮眸子瞭其星明塊獨守此中野兮困無禾而爨清拂素琴之浮埃理坐愁之遺聲忽推几而睨天送飛鴻之杳冥或過其前曰有心哉然何求昔林類之行歌云既老而無憂翁年運而德加翁何為乎坐愁翁偶顧而若聞猶援琴而不捨曰子非魯之儒服者耶何以不知漆室女



者晝輟紉而淫思宵倚楹而悲咤彼淺哉其量人匪魯  
憂而欲嫁豈不誤耶吾亦傷夫魯之君子昔在厄而不  
糝賜自殖而何誅顧樂軒而中紺羌同道而恥茲廼長  
饑乎回憲彼林類其何人雖信賢而獨善或者曰未既  
也請言翁之近者昔蘓門之遯民絢枯桐之一絃匪無  
絃之寂默異五絃之啾誼對阮子惟長嘯為嵇生纔一  
言人欲怒之戲排諸淵勃率而出則又粲然彼何知夫  
坐愁幾蹢躅乎樂天矣然聖人猶以謂樂天有憂之大

者也況憂人之憂豈有既哉於是翁泛然可油然謝曰  
憂樂外矣吾當虛之

坐進庵賦

有物于此無梁無柱圓廣六尺非囷非窳粟米之宅上  
蒙藁秸下履瓴甌塗墁晦外中腹純白平時鼠竄俯仰  
不迫主人惜學敢謁之客客曰此夫外丘阜而內穴谷  
者歟上荷笠而下湊輻者歟首枝撐而身純束者歟有  
登降而無阼賓者歟混沌既死竅鑿乃張牖則有目戶

則有吮櫓巢營窟太古所藏周旋無間病於德方邑都  
莫賢原野則良者歟雖然可以五人羣居宇宙有餘不  
可以八口次且孰知婦姑彊名坐進其實中虛聞諸博  
識是謂奢廡

雞肋集卷一

欽定四庫全書薈要卷一萬五千二百六十九

集部

雞肋集卷二

宋 晁補之 撰

古賦五首

北渚亭賦 并序

北渚亭熙寧五年集賢校理南豐曾侯鞏守齊之所作也蓋取杜甫宴歷下亭詩以名之所謂東藩駐阜蓋北渚凌清河者也風雨廢久州人思侯猶能道之後二十

一年而秘閣按理南陽晁補之來承守乏侯於補之丈  
人行辱出其後訪其遺文故事廩有存者而圃多大木  
歷下亭又其最高處也舉首南望不知其有山嘗登所  
謂北渚之址則羣峰屹然列於林上城郭井閭皆在其  
下陂湖迤邐川原極望因太息語客想見侯經始之意  
曠然可喜非特登東山小魯而已迺撤池南葦間壞亭  
徙而復之或請記其事補之曰賦可也作北渚亭賦其  
詞曰

登爽丘之故墟兮睇岱宗之獨立根旁礪而維坤兮支  
扶疎而走隰跽琅邪與鉅野兮梁清濟而北出前漫漫  
而將叱兮後摧確其相襲坯者扈者嶧者岵者礪者礪  
者障魯屏齊曰惟歷山或肺附之箕拱環連勢厓絕而  
脈泄兮萬源發於其間谷射沙出浸淫渠濺澆澆汨沁  
彭澤渤溘忽漢起而成川經營一國其利汾澮防為井  
沼壅為碓磴得平而肆迺滉漾而滂沛經民間而貫府  
舍兮渚為池之千畝惟守之居面巖背阻邈閭閻之遺

址兮肇嘉名乎北渚悲經始之幾何兮牛羊牧而宇顛非  
境勝之為難兮善擇勝之為難嘗試觀夫其園千章之  
萩合抱之楊立而成阡躋歷下之宮窵望南山之孱顏  
脩榦大枝出欄造天藐砮岫之蔽虧乍髣髴其雲煙思  
僊人之樓居尚輕舉而高飜盍駕言其北游登斯渚而  
盤桓岡巒忽其翔舞萩楊眇以如箸撫千里於一眸收  
城郭乎環堵其下坡湖汗漫葭蘆無畔菱荷荇藻蘅  
荃杜蘅衆物居之浩若煙海歲秋八月草木始衰乃命

嘗苦觀漁其睢鳴榔四合方舟順涯鱸鯉窘乎深塘兮  
鴻雁起於中沚復有桂舫蘭枻浮游其中榜歌流唱自  
西徂東纖餌投隈微鱗掛空客顧而嬉傾盃倒鍾明月  
出於缺嶺夕陽眇其微紅天耿耿而益高夜寥寥其方  
中駭河漢之衝波披海岱之冷風恐此樂之難留兮願  
乘槎乎星渚期韓終與偓佺兮采芝英乎瑤圃庶忘老  
而遺死兮路漫漫其修阻於是酒含太息中座語客曰  
自昔太公奄有此丘是征五侯桓公用之攘狄尊周方



其盛時山河十二號稱東秦臨淄遨樂中具五民秋田  
青丘實圃海濱而薛又其小邑也區區之賦食三千人  
其彊孰與比哉觀華不注竭其孤巘虎牙桀立芙蓉菡  
萏尚想三周追奔執轡下車取飲僅以身免困責質於  
蕭同尚何私乎紀甌而齊自是亦不競矣夸奪勢窮雖  
彊安在事以日遷而山不改則物之可樂固不可得而  
留也認而有之來不可持所玩無故去何必悲此齊侯  
之所雪涕而晏子之所竊嗤也今我與客論古人則知

迷屬有感而歔歔豈不重惑也哉仕如行賈孰非逆旅  
託生理於四方固朝秦而莫楚曾無必於一笑尚何知  
乎千古於是客輒然喜再拜舉觴而前曰凡主人言理  
實易求而我曠然已忘昔憂使客常滿使酒不空請壽  
主人如漢孔公主人亦輒然喜受飲反觴執客之手而  
言曰詩固有之未見君子憂心忡忡既見君子云胡不  
樂再拜洗觴而酬客舍然大笑

是是堂賦

并序

是是堂彭城劉子義仲之所作也劉子讀古人書則曰  
文王我師也周公豈欺我哉處今行已則欲就有道而  
正焉抑荀子所謂是是非非謂之智者以名其堂而居  
之而南陽晁子補之聞而疑之曰劉子果於自信果於  
不信人也哉夫理無常是事無常非使天下舉以為非  
而劉子獨曰是將誰使取正使天下舉以為是而劉子  
獨非之安得力而勝諸嘗與劉子問津於無可無不可  
之塗而弭節乎兩忘之圃夫安知吾是之所在故賦其

名而連牝其義則操吾戈以伐我者遠矣其詞曰

隘區中之無覩兮邈荒忽以遠求軼太始以為元兮日

與月之幾周本獲鼎之推策兮四千歲其已多謂過此

或不遠兮世倏眴而謂何紛蛇身與牛首兮詭變化之

莫原神與民其雜糅兮或傳之於余先川東南而辰西

北兮余不知其何故懽絕維與折柱兮又孔氏所不語

莽湯革之相質兮駭一世以共疑一身吾不自識兮疇

莫覩而能知遭吾輶乎八埏兮旋吾舳乎四海蘄不死

之遺氓兮稽吾聞之所在曰七聖至此而競迷兮羌誰  
使之正女謁輕舉而遠游兮吾將從巫咸之所處離屯  
雲以衛屬兮前犇霆使抗旌王良御以踰躔兮何鼓隱  
其砰磷涉橫潢而濯淹兮偕斗車而轟轟九虬蜿以承  
綏兮六鳳翼而繽紛載格澤而雉厲兮歛耒撤捩捐旬  
始而遺撓搶藐無朋吾孤往兮騰光景之所經俯六合  
以周流兮觀一氣之所營叩滴湟之何居兮問黔羸所  
休屯芒東西之無軌兮沕晝夜之無門追汗漫而與言

兮若不見而不聞將下車而從之兮則竦身而遐征忽  
寐寤而莫質兮形欺魄而獨存神黠晦而載浮兮涕淫  
夷而霑襟聞佞僞之達者兮將與議夫本根斬乎保已  
而不失兮何足與論此之至神鵬南徙而終息兮彼安  
知夫天地譬井蛙之跳幹兮吾亦安知其孰智謂道非  
物之外兮盍反求諸世間泮得失之兩塗兮一智者之  
足明世溷濁而智鮮兮薪得鹿而國爭曰吾不知孰是  
兮據有鹿而偶分待黃帝以占夢兮曠百世而莫尋雖

人跡之所至兮如窮北之衣皮聞中國之有蟲兮咀葉  
飽而吐絲化草木之所染兮煥五色而陸離所不睨而  
懔懔兮咸莫信而我非饗香以為朽兮視素以為黑有  
迷疾而慮易兮意是者之反疾衆謂西施美兮何高舉  
而深潛魚熊掌以為羞兮帶螂蛆之所甘物各驚其所  
知兮孰為是而正女蹇多知而博辯兮盍質諸魯之君  
子曰經禮三百兮曲禮三千非堯舜禹湯之適兮為他  
道而勿傳守株以待兔兮卒不可得從女以決疑兮而

增余之惑規吾觚以轉圜兮如二兒之于國權謀既不  
用兮仁義又見賊哀失時而齟齬兮改此度誠不能陳  
瓊茅以潔中兮懇神龜以吉占朝從而莫違兮吾安所  
行女意王倪蹲循乎不知兮齧缺昧曹於同是違一世  
何不可兮山澤又多龍蛇深林杳以無人兮雨雪雰其  
來加前夔魑後虎豹兮獨狻笑而施施石嶸嶸嶸嶸以  
增波兮路阻難以委移結幽蘭以獨立兮歲將莫而增  
唏懷同心之離居兮悵猶豫而狐疑必處廓若此而後



可兮雖濟百世何足以嬉譬鄙夫之硜硜兮經溝瀆其  
誰與懷古人之兼善兮吾不忍抱吾之所獨五官異用  
兮物各派吾之一以聞聞性兮一非有異回車易野兮  
絕道九州吾既不從夫斯人兮盍反吾之初修闔萬宇  
以聚閭兮載百族與並游人羣固有倫兮生固有涯蠶  
桑而被兮粟以禦飢吾何以異於人兮曾跼蹐而支離  
伯夷死名兮盜跖死利溺者入水兮拯者亦用以顛沛  
曾稽失之未暇兮羊固已遠去而千里重曰道無封不

可畔兮雖千歲由今日忘彼與是兮吾何愛嫉乘虛無  
以為輿兮託不得已以為鄰忘處石而出火兮超同物  
而獨生

北京官舍後梨花賦

梨於經無記而舍後梨人所不賞故賦之其詞曰

攬察草木本原所起李梅紀於隕霜兮橘柚隨乎織篚木瓜  
足贈而詠詩含桃可羞而記禮雖信微而有託兮亦不  
委夫厥美惟茲梨之俊茂兮羌獨遠而未揚舍溫潤之

秀質兮皎若和璧榮其光澹暗慙其無偶兮歷年歲之  
已長莫春者陽暉憤盈羣木解膚似夸者似鬪者似顛  
者似頽者色非一色同嫵殊嫵茲梨娟然獨見其素繁  
過時兮不省滋脈脈兮後戶亦何必耀榮華兮朝日顧  
猶私兮泣露然而中唐之樗枝大扶疎以其近人人以  
繫駒則磨則齧則折則泄孰與夫朽壤幽薄厥植雖弱  
履屐不蹈根乃磅礴

後招魂賦

屈原作大招魂宋玉作招魂夫士以忠放濱於死故招其魂而復之予交之長者王安仁賢且孝適未仕病以天予傷焉不敢以非吾上也借不知命之辭以愬于帝作後招魂

竊悲夫天何為生此碩人兮蹇幼清而宜脩既服義以時可兮又何為委厥美而改求天固復諸其初兮則如勿俾此昭質帝命巫陽曰有愬于下汝徃聽之精神將離筮而復之巫陽曰物死與生司命有職自廢自起朕

何能識帝疆之乃下招曰魂兮歸來去君七尺之驅胡  
為乎大陰些舍君之靈龜而糟苴沈些人固懷慈而抱  
愛兮一言欲訣而怵怵些君胡樂誘於異物兮從之跼  
跂而遠行些魂兮歸來上天不可以游些有神當闕其  
視畏人些其下百鬼伺人往來執而殺之些徜徉無所  
倚歎息不可些幸而得還無所求階些歸來歸來不可  
以久放些魂兮歸來地下不可伏些土怪墳羊狼戾突  
觸些蛇身鬼首蓬髮髻鬚當前搖毒些九幽之府惡厲

牛首得人以械獄些歸來歸來不可以久屈些魂兮歸  
來無止乎山中些山木蕭蕭猿狖所居些藜藿柱逕泉  
祥魑怪杜鵑號呼些夔魍罔兩笑風涕雨見人揶揄些  
虺虎封狼磨牙吮血僦僦穴居些魂往顛隤狂惑失塗  
些歸來歸來久幽恐不得出些魂兮歸來君無下海些  
大海盪潏日月四周些白波連天五山狂浮些巨神操  
蛇唯魂是因些淫氛瀰霧八方錯易魂往安投些百怪  
謹舞羣出類沒更遨迭遊些霹靂制手電蛟龍直起江潮

逆流些有鳥九首載鬼盈車擢筋以縻其輶些歸來歸  
來久淫恐不得還些魂兮歸來君無樂兮八蠻九夷些  
遐陬遠瀝氣候靡齊些烈陽慘陰鞬裘裸裎涼溫不時  
些蔽林夜祠被髮徒跣妖魅叢嬉些魂往非族抵冒凌  
欺些歸來歸來恐自遺羞些魂兮歸來君無以髑髏為  
南面之樂些毛枯骨化精離識落些螻蟻所寄烏鳶所  
搏些蚊蚋姑暇狐狸齧嚼些醜然七孔攬擲疇覺些棘  
薪葛蔓交錯綿絡些鋤耰野火侵凌甚虐些歸來歸來

無自遺賊些魂兮歸來八紘六合無一可以翱翔些魂  
孤迢迢消耗淪亡些歸來歸來反故鄉些工祝前君無  
迷方些崇城兩溝夾高楊些車軫馬駢交康莊些日中  
為市集工商些高門懸箔襲慶祥些選閱甘旨薦北堂  
些金昆玉季美雁行些斑衣竹馬兒嬉傍些曲欄橫牖  
窈洞房些長蛾曼綠含若芳些齊紈阿錫曳明璫些夏  
瑟鼓簧封豕羊些食前方丈醃椒漿些嘉賓雜坐紛賢  
良些朱顏欣欣君樂康些魂兮歸來反故鄉些亂曰龍



火頽坤兮虛正宵萬物酋勅兮傷秋郊汨君徂征兮默  
誰曹天地為鑪兮物流以銷一受成形兮巧專莫逃斯  
彌頤輅兮一體所交鼠肝蟲臂兮忽何遭魂知復吉兮  
改而超與君除被兮三下招張君之衣兮升屋號魂兮  
歸來居匪遙無哀我心使予勞

披榛亭賦

舒陳儀甫官於魏覽觀公圃廢城之堞壘其土作亭堞  
上名曰披榛斬木枝為梁柱管蒯衣之目踰四垣矚五

里外進客而語曰樂哉此亭客曰微主人言之固願有  
謁也今夫山居者遺世遠舉煙霞之府屢屨之顛翠微  
之顛穹石曲隄上正宛中如堂如防猱獫之所處首更  
奔星高出雲霧足蹈太虛下見雷雨邈乎杳冥一攬九  
土此人以登邑門之垤蹤步齟齬若絆若禦若見陸櫓  
遊意無所至於平原案衍秫麥之土漫漫漠漠蔑有堆  
阜下澤之車短轂愔愔晝日旁午出汗霑滑此人適逢  
沙丘宿莽廣不陰路怠而願息解轡弛負相攜偃僂忽

如飛翔延頸顧慕矣若迺平時室處矇矓環堵窮年不出四壁為伍周以闌閤域以牖戶如彼井谷潛逃之鮒衡從北南適在跬步仰而視之不識天宇此人出城而望見桑麻綠野猶將樂之況乃矗乎巍巍據城之陴出屋之危前無蔽虧俯首而窺哉夫明不求晦處內慕外各以其不足所遇生貴雍門之技悲者驚心鍾儀見縶尚猶南音主人殆倦遊窮居者耶不然何以超然於此而志意洋溢也嘗與主人周覽五嶽岱嵩衡霍巫廬九

疑白鹽赤甲青城峩崿歲莫深林攀援桂枝結軌羨門  
高谿方駕赤須安期委區中之跼踖遊太上之無涯則  
主人樂此耶嘗又與主人服纖離騷耳夸父前乘魯  
陽奉轡超人跡馳萬里以觀乎八紘九野觚竹北戶與  
西王母日下之地扶桑月窟紫淵丹水大章所步廬敖  
所履殊方怪物齊諧之志焜煌譎誑經目而記則主人  
樂此耶嘗又與主人觀乎京洛神州宋魏兩都未央建  
章天子之居前殿武庫金闕玉除東華耀靈西華望舒

復道氤氲飛閣渠渠千官鏘鏘劒佩以趨朝會而出冠  
蓋布途富貴潤奴隸衣食仁里閭則主人樂此耶嘗又  
與主人技術孫吳抗技頗牧左象弭右魚服韓厥中御  
州綽為右馮軾而寓目以觀三軍之斬伐擊刺琅琅礚  
礚風起雲會北登燕然躡轡長塞西屠石堡飲馬瀚海  
麒麟圖形贖死胄代則主人樂此耶嘗又與主人出咸  
陽經上蔡過邯鄲桑中大隄石城之間士女亟會倡樂  
止客盃酒相索吹竽鼓瑟鳴箏擊筑六博蹋鞠宛珠之

簪傳璣之珥羅裾從風衆曲入耳人生得意亦何能已  
則主人樂此耶主人油然而笑曰人壽幾何而時易失  
細猶不果巨安可必深山大澤實生龍蛇高明之家鬼  
瞰其室吾非以狹驕廣以儉笑侈也狹易治儉易供此  
吾所以樂也窮秋九月狐狸出穴宇宙隆冽時亦登吾  
亭而支頤藜棘之分披朱實之離離秋風鳴枝久而不  
去羣竅盡奏若歌若歎起左作右時亦杖藜隱几而聽  
之寂寥兮無為淡乎熙熙似遺已離物而不知飛鴻滅

沒夕陽就微月出埤垵樂而忘歸則客亦樂此乎哉於是客曰我以衆夸主人而主人以少奪我主人賢哉非僕所及也

雞肋集卷二

欽定四庫全書薈要卷一萬五千二百七十

集部

雞肋集卷三

宋晁補之撰

辭

望渦流辭

渦之水西流過譙郡北乃稍南又東流入于淮包渙二水皆經其南以東歲旱深不五尺秋雨集始大而城之東北惟渦曲水深黑灌木蓊然舊有祠曰龍嘗宅焉作



望渦流其詞曰

望渦流兮浼浼勢南折兮東還水衝隈兮岸圯嗟龍去  
兮幾年俛余進兮聚祠儼帝服兮神冠牆壁績兮怪竒  
泯虵穴兮蝸盤列缺鞭兮雷輶衛兩鰻兮驂鱣老龜起  
兮霧游跂瑇瑁兮鼈鼃或若馬兮非人紛陪後兮導前  
木陰陰兮藻長科斗舞兮下顛儵羣出兮旅嬉忽俱去  
兮不還意土國兮無龍恐逃桷兮藏櫨帝有命兮時乘  
亦隱隱兮填填世鑠石兮流金將誰職兮此愆包之水

可揭也渙之水可厲也前汝足其暨也後汝跗其躋也  
江有鯢兮橫淵海有鯢兮翔天汝隘此兮往爭滔淫水  
兮八埏重曰望其厓若有宅於隈不汝爭於厓汝安其  
隈澤不必施也

包渙二水  
與渦竝流

### 追和陶淵明歸去來辭

辭長而歌短歌有和辭無和也言語文章隨世隨異非  
擬其辭也繼其志也作者七人矣詞曰

歸去來兮吾無以歸奚以歸既身不足以任責畏首尾

而心悲慕往昔之經世嗟吾力之莫追彼辭位而灌園  
豈吾今之獨非雨冥冥而荷笠榛莽莽而褰衣我行野  
而視天覺寓大而身微乃矜蚩蚩止驅息奔背隍築室  
面坂植門三綬從褫圖書尚存忘瓠落之可憂比浮海  
之為樽躒太初而游意弊無極而彫顏反國蝸而自足  
俯巢幕而亦安解予轡之沃濡兮脫予牽之間關識鳥  
鳴而物華陶陽氣以流觀悟息淵而消枝亦瑾戶而俱  
還惟文字之幼工則雖老而桓桓歸去來兮彼河濱之

善游或往學而喪生復裹糧其安求善陶生之達情不  
與世兮同憂實迷途其已遠懼斯人之莫疇或待免守  
株或遺劒刻舟雖成事之不說聚悔踰於山丘庶西方  
之至言聊反聞而逆流守一靜而為君亦何往而不休  
已焉哉一晝一夜成四時子之歎川逝不留顏光不可  
使東之韓終王子喬汗漫難與期俯寸田之荆棘曷不  
旦耘而莫耔悲在堂之蟋蟀慙不樂於唐詩悟死生之  
如夢亘今古而無疑

返迷辭

五達跂行者迷茨茀蟬蜩嬉杳淒淒莽離離赫隆曦  
可還時日黯西與誰期往不思逢詭期死獨貌安可知  
亟反之大道夷都邑差車馬馳冠劒祇志可持能足施  
貴名垂好爵靡儼罇卮厭食梁肥窈室惟安歛妃觀盈虧  
浩浩移逝不遲咸若斯何綏綏不返為從魍魎神索衰  
今狐疑後當悲我此詞如泰龜

冰玉堂辭并序

冰玉堂者始前門下侍郎眉山蘇公子由哭故廬山隱  
君劉凝之與其子道原之詞所謂潔廉不撓冰清而玉  
剛者也鄉人聞之其賢者喜其頑與懦者皆廉且立則  
相與採冰玉之語以名君堂而祠之而前起居舍人譙  
郡張文潛又因其名以為記蓋君父子博極羣書道原  
尤精史學而皆耿介守義不偶俗以沒世慕而傷焉故  
門下以謂夷清而餓死惠和而三黜道不與命謀非和  
實得非清實喪而起居以謂司馬談與遷文學美矣而

無聞於風節疏廣與受風節同矣而無傳於文學蓋門下至借君父子以論夷惠起居合其長謂過漢四人者以是知君父子為一時知名偉人所愛而推之無間然者如此則夫冰玉之名非鄉人故舊者之言也天下之言也補之生雖晚猶與君父子並世而不及識既為館職修國史實錄盡得道原所著十國紀年資治通鑑外紀諸書而觀之且門下補之所嘗事而起居所嘗游也因其言以益信顧雖不及識與夫識而知之者自以謂

深且遠矣又與君之孫義仲游相好元符中以罪遷玉  
山道出星子求君父子所葬而拜之五老巉然臨其上  
水交流其下松栢一徑如幢節行路耕者咸指而言曰  
此劉君之葬也則皆有敬容因喟然太息順塗而詠曰  
皎皎白駒在彼空谷劉君於是無愧乎天下之言矣既  
而復曰屈原以讒放而死而君父子進不犯難退而伏  
清節以沒與原異於原不更愈乎推此志也雖與日月  
爭光可也況冰玉乎哉凡楚人之詞皆傷夫中正不遇



者而作也故以若詞弔之曰

論世以觀士兮集義以為詞所非正而敢從兮日可罣  
而東之嗟若士之弗獲兮羌何忿而負石繫聖賢之出  
處兮惟導道而守德鳳覽輝而乃下兮離猶恥乎腐嚇  
非九方之為使兮夫何足以得馬廬岑岑以鎮楚兮洵  
大江之東淒分陰陽之晦明兮鍾斯人以正直惟天道  
與地寶兮非所求具猶愛與之全而不用兮懷斯美以  
固在大固不可以適兮方固不可以圓試回功謝於土

穀兮夫乃同道於禹稷譬人生猶吹呖兮無得喪之可  
齊紛吾何指以為正兮服吾初其庶幾

漫浪閣辭

并序

南康劉義仲壯興志操文義蚤知名於士大夫年四十  
矣而學問亦苦蓋不欲一日棄其力於無用也築屋廬  
山其先人之居自號曰漫浪翁意以比元結從仕與物  
皆不得已也豫章黃庭堅魯直曰壯興未至於翁行已  
立志不可謂漫浪者潁川晁補之无咎以為知言壯興

曰請極其義補之曰唯其詞曰

沛高皇之受嬴兮劉別子曰楚元羌好詩而說義兮敬  
設醴於穆生戊始怠而穆去兮申白笑而鉗市富傳孫  
而失國兮派辟疆之支子爰清淨而少欲兮以身悟乎  
霍光蹇孫向之洽聞兮至耆老而彌良曰衆賢和於朝  
兮萬物和於野粵百世而能調兮民胥來而鳳下惟劉  
有後於楚兮千歲發夫道原流其芳以益遠兮偉壯興  
之不愆原惟博而好直兮向異世而復起興惟進而未

已兮載向學亦不墜彼元結之信修兮羌何為此漫浪  
也將履中而晦外兮其德固天之放也惟漫浪之為言  
兮匪正則之嘉名豈其懲屈之死忠兮欲猗移以保生  
結當易之一爻兮幽人履而正吉輿方壯而惡畫兮棄  
爾輔欲誰賴吾語子漫浪之可兮遺物徃其庶幾苟畏  
人而羣於人兮拭唾面其猶殆朝騁望乎紫霄兮夕歸  
次乎左蠡五老兮在上星子兮在下垂瀑介於高丘兮  
洞深林而北靡飛梁亘於三峽兮倏異景而殊世青松

屋兮桂宇辛夷房兮梅戶蘭糗兮菊張蓀體薦兮肴若  
芳雲駟兮霓輶歲將晏兮誰與游煙為衣兮水為佩君  
誰須兮林之際吾以漫為旌兮建彼太虛之上也吾以  
浪為乘兮周彼八荒之外也壯萬里而不逢人兮御謁  
我以宜止掩轆轤而曠洶洶兮羌何以辯乎明晦彌高  
出於千仞兮羣鳳過而北南彌幽徑於雷室兮列缺驚  
而後先求佺僑而不得兮咸勃窣其在下乃山澤之臞  
兮夫何足以跂而望我茫吾不知其所如兮黔羸告我

以何舍出無陰兮入無陽旋丹崖兮匝大荒忽臨睨夫  
故居兮羣梯危之蜂戶偃白叟之扶童兮迎謂我以良  
苦返吾稼兮復吾樵山嶸嶸兮江滔滔興先人之善俗  
兮雖百世猶未改彼魯衰而斷斷兮吾老穉以知恥匪  
禮失而求野兮民固化於不怵興克家而好常兮庸謹  
行以毋傲懷向原之遺直兮念爾祖而履薄陳洪範之  
九疇兮叙三統與七略以為博而弗考兮蹇無用而束  
閣紛興世之多賢兮匪曲全而好修惟仁宅與義路兮

羌可居而必由結信賢而自晦兮忘其同物以迷世鳧  
與波而上下兮夫固非駒之所喜亂曰接輿詭而悟聖  
兮匪沮溺亦楚狂聖與言而莫顧兮人以為知乎大方  
既不足用吾中兮吾將從回憲之所臧

遐觀樓辭

窘牆堵之伏潛兮登斯樓以遐觀匪吾居之為隘兮乾  
坤習其盂盤仰攀薨而拊楯兮宇曠曠而益寬彼何大  
而能舒兮吾何眇而莫閑霜肅壘而木枯兮潦收竇而

澤乾蓬鳴野而相追兮知海冰而天寒左睇兮城闔右  
盼兮林垆商賈紛其晝合兮陶冶蓊其煙興之杳杳以  
在東雙柏近而青青物暇遽之不同兮余亦不知其何  
情聊浮遊以相羊兮初怫鬱而中清彼塊北之無垠兮  
人駒隙之暫更道本夷而世險兮夸奪厭食而卒平周垣  
兀其跨衍兮逝千古於樵耕春與秋之不淹兮歲忽忽  
其崢嶸招搖指於北陸兮澹黃宮之陽生固天道之反  
覆兮氣默會而孤萌朝卷箔而極望兮稍霧廓而日晶



及暘景之方中兮晞余髮乎南榮浮雲起而景翳兮西  
暝合而覩星風撼撼而感軒兮雀啾啾而赴楹收百為  
以清慮兮施余綢而榻橫漠洶洶而非聲兮邈冉冉而  
非征形欺魄而若存兮神無虧而靡成目瞳矐而罔覲  
兮坐待日之方升夜寥寥而未央兮羌不寐而無營

樂哉侯之邦兮樂哉侯之堂兮二章

樂哉侯之邦兮封楚宮與復闕美哉洋洋水兮崑崙始  
乎并川桐離夫其實兮綠竹兌於丘園三年庶夫有成

兮蹇吾師其永歎營室壁而建壙兮參國一其可觀塗椒丘  
吾駕車兮攬予騑之嘽嘽襲予旂之悠悠兮侯降觀其于  
田春陽滿其親天兮乃物作而芄蘭來吾省夫在疇兮介  
黍稷之有年侯寧般于遊兮無非事而不煩羌信修而好  
我兮曷懷歸而翩翩信侯邦之可樂兮蹇攜手其同行

樂哉侯之堂兮高門桀兮蘭錡切雲冠之戔戔兮四牡  
矯兮戾止夜悠悠其未晨兮紛侯庭之徙履雲容容而  
承楣兮日澹澹兮階祀雨雪覲其將流兮黃宮動乎子

美爰俶生之煌煌兮又尚茲夫介祉嚴若植其姣服兮  
侯何須兮堂際進蕙幃予稱觥兮芬予席之蘭茝朱顏  
忽其滿堂兮五音昌兮來會蘋姑射之綽約兮愿慙保  
而為使洵侯堂之可樂兮與日月其無圯

維夫君兮桂舟一首送梁正受歸汶陽

維夫君兮桂舟酌余酒兮攬君留君何為兮此野菊菲  
菲兮蜨下韡韡兮煌煌爛金敷兮襲余堂茱萸兮芙  
容衆芳越兮亂五風飢咀兮靈芝君歌樂兮余和之日下

兮野陰澹忘歸兮中林橘棟兮梅宇紛瓊茅兮被南榮  
白羽兮黑翮邀僊人兮語此文余高馳兮世之外君焱  
舉兮先余至襟帶兮東方旦爭門兮汶之陽大野兮始  
波翔鶴鶴兮嗥駕鷺羣宿兮迷趾旅食兮殫穗霜肅肅  
兮葉方下君欲濟兮淹回水通道兮躑躅冠如箕兮帶  
長鋏里千室兮士一喙余不善兮紛余許世謂折揚好  
兮余白雪而莫知棄火布而以為垢兮胡不浣炎而振  
之彼鑊邪而能言兮工謂余以不祥聊逍遙而挫銳兮

蒙黯黹而益光

山坡陀辭

山坡陀兮下屬江勢崖絕兮濤波所盪如頽牆松鬱律  
兮其高百尺旁枝虬驚葛藟之仰不見日兮下可依吾  
曳杖兮吾僮以吾之書隨邈余望兮水中泝頽然而長  
者黃冠兮羽衣軒頤坦腹濤石箕坐兮石亦有趾安不  
危四無人兮可忘飢僊人偃佺兮自言其居瑤之圃一  
日一夕兮飛相往來不可數使其開口而言兮豈惟河

漢無極驚余心默不言兮蹇昭氏之不鼓琴檐將翔兮  
山海與日月兮常在若有聞兮夢中仇池我歸路此非  
小有兮噫乎何以樂此而不去昔余遊於葛天氏兮身  
非陶氏猶與偕乘渺莽良未可兮僕夫悲余馬懷聊逍  
遙兮容與晞余髮兮蘭之階余論世兮千載一人猶竝  
時歧又有歧兮余行詰曲欲知余者希我我洋洋余方  
樂兮譬余擊舟於水魚沉鳥揚亦不知何必每念輒得  
應余若響音坐有如此兮人子期

白紵辭上蘓翰林二首

白紵芬莫緝紉蘭作衣袪朝今日所暴莫兮雨所濡木  
瓜諒微物期報乃瓊琚芳華辭甚妙贈我不如無  
上山割白紵山高葉撼撼持歸當戶績為君為締綌不  
惜潔如霜畏君莫我即誰言菖蒲花可聞不可識

江頭秋風辭

雒陽客後車結駟傳燭食人生富貴不易得江頭秋風  
旦夕起胡為翩翩雒陽陌雒陽陌吹塵埃江頭樹安在

哉秋風起菱花開鱸魚肥歸去來

琴中宮調辭

神僊神僊何處青山裏白雲際不似人間世源上正碧  
桃春清溪乍逢人住無因憶紅塵出洞花紛紛




雞肋集卷三

謹案卷一第三頁前五行衆傑儵而好朝兮刊本  
傑儵訛虎象據甘泉賦改

卷三第三頁五行子之歎川遊不留刊本遊訛  
遊今改





總校官庶吉士臣張能照

校對官編修臣方燁

謄錄貢生臣郭棣泰

欽定四庫全書薈要

集部

雞肋集卷四至  
七

詳校官助教臣謝登雋




欽定四庫全書薈要卷一萬五千二百七十一

集部

雞肋集卷四

宋 晁補之 撰

  
詩  
擬古六首上鮮于大夫子駿

西北有高樓

西北有高樓縹緲齊紫清  
周欄十二折飛鸞結丹楹  
上有絃歌女充耳以黃瑛  
當窗弄白日顏若苔之榮  
陽阿

奮哀響梁櫬有遺聲不惜厲清商零霜飛園英誰為聽  
之者皎皎自知明幸承遺襟眷同車以遐征

東城高且長

東城高且長下瞰阡與陌谷風麗百草春華紛已白良  
時忽如此馳景一何逼喟彼飯牛詩終年守寒阨恭儉  
夙所敦葛屨傷褊窄身為物逆旅生乃遠行客豈無百  
日蜡樂此一日澤美人顏煌煌奇服爛五色彈箏奮新  
響盃酒縱相索鬪雞逐狐兔六博呼一擲貧士悲失職

坎壈何所迫安知黃鵠舉隨時振六翮

庭前有奇樹

庭前有奇樹好鳥鳴啾啾朱榮被紫萼采掇以忘懷棄  
置而不省秋風淒以摧不惜朝華莫君行殊未來

冉冉孤生竹

冉冉孤生竹託根中谷卑結髮事君子江離近華池江  
離榮有時迨此春冰期玉盤有嘉餐思君以忘飢棗下  
何纂纂朱實亦離離秋風一披拂宛其為枯枝願垂太



陽惠照妾葵藿微

涉江采芙蓉

涉江采芙蓉江上零露滋方舟不能度日莫白蘋悲清  
波有鳴鴻蕩漾安可期幸因南風逝寄言欽所思

生年不滿百

生年不滿百一日何三秋花開苦多雨何不張幕游行  
樂時不再春榮豈長在古人輕尺璧愚者昧所戒君看  
龍與虎飄忽不相待

建除體二首荅黃魯直教授

建策移漢都奉春緣衣布除地願見公乃以舍人故滿  
舩載明月且復酌清醕平旦襪襪出牛羊下來莫定境  
要兩言出處非竝趣執臂欣逢迎秋蘭在堂下破甑雨  
生衣蹇不改茲度危莫如人心難莫如行路成事安得  
悔來者其可悟收拾不須陳千言一棄屨開門見井市  
終歲紛遑遽閉門面牆壁少日豐暇豫

建鼓求亡子初昧學所之除去日月多及此歲未遲滿

國和已人若士誰與知平陸不推舟客行當來茲定居  
厭屋廬風雨勞所思執鞭慕昔人孰與並此時破裘不  
御冬要假完腋裨危言則來詬慎密又逢譏成德尚如  
是薄志安能期收聲復藏熱雷火忽然微開口且復歡  
是事置勿推閉眼可內視獨復不自為

八音歌二首荅黃魯直

金蘭况同心莫樂心相知石田惟清霜念此百草腓絲  
看煮繭吐士聽憤悱語竹馬非妙齡美人恐遲莫飽繫

魯東家今君尚天涯土膏待陽瘴氣至如咄嗟革薄不  
可廓士迫下流惡木無松栢心蝎處螻蟻託

金丹妙通靈子有遺世術石髓不成餐閔予多滯骨絲  
聲紡事莫搗聲寒事來竹葉將菊花及時同一盃匏器  
祀天地貴質不貴華土緣井渠繁生氣泄大和革面固  
非性小人變丹青木雞本無心風雨安所能

感寓十首次韵和黄著作魯直以將窮山海迹勝  
絕賞心晤為韵

鵙鳩興獨居百兩誰與將未見憂忡忡既覲為龍光吹  
竽沸齊市零雨暗空桑寒歌牛輓底激烈氣彌剛

雁以無能亨鼠以有技窮古來達生者神不馳其胸物  
或似而非藁本奪芎藭臧否何間然吾師阮生風

倉鷁知陽春喬木聲闐闐白駒不食苗奈此空谷寒昔  
有丹徒士檳榔貯金槃富貴懷隱憂無寧歸故山

吾期瑤之圃玉英良可采崑崙在萬里積石更磊砢學  
經儻無用詩禮發含琲叢臺尚何為絃服若煙海

鼓吹出西羌光華動眉額韃橐望酒泉面有可憐色念  
身匪兇虎少日四方迹百計等畫蛇老大悲故國

謝公文章餘幽事課伐嶺清詩如玄酒胡乃淡而永得  
無西堂夢春草句彌勝但使田野傳何須論銘鼎

江南盛鬱蒸代北紛霰雪卞生無出游何以得此則一  
朝有天運春華未萎絕吾猶託雄鳩而彼固不拙

平生莫逆交弦斷寄心賞相思望青楓目極江水上念  
當及時節農事動春壤來者不有年何能咎吾往

楚有吹竹者工作百獸音削格為爾多滔滔寧適今嘗  
俾範馳驅終日無一禽復之儻或可詭遇亦何心

葉公好畫龍龍固不可晤安知下其室驚駭暗楹霧昭  
王亦貿骨糞以得馬故相者競舉肥終然駒遠去

西歸七首次韵和泗州十五叔父

潔腹不受污昔人因食薇薇亦周土生悲哉懷永飢武  
王與周公聖德天動威奈此二子何猶歎安適歸

霏雨晚霑裳零霜曉被路驅車歎時邁所遇一無故悠

悠天地宇萬物各有聚閱我冰雪姿幽居從可住  
莫投古店宿夜聞狐狸嗥僕夫告行邁起視月尚高清  
霜來何許不覺滿我袍逆舍良非時求前茲已勞

浮雲如游塵倏忽蔽白日登高念搖落歲莫一何疾東  
陵種瓜事富貴寧可必人生無南北行樂時易失

驅馬馬走山回車車漸水塗窮我何適慟哭盈襟淚巢  
居識風聲穴藏知雨意救鬪曾得傷纓冠亦可已

贈君彼風蘭佩之可為璫贈君彼露荷製之可為裳薄



言茲擷掇道遠莫置傍崢嶸又歲莫與君同所望  
古人重生男豚酒慶親戚桑弧射四方言有四方役奉  
璋比德性墮地要膂力如何晉公子安樂忘所適

感興五首次韵和李希孝

海鳥御羊角飄然凌紫清有背如泰山未覺毛羽輕鹽  
陽亦羣飛日景為不明空倉自苦飢安得有此名  
人生須富貴如族河之清草木競榮華春服亦已輕桑  
田自足樂未可居高明君子順天道小人眷時名

長歌遺世情滄浪之水清鑠金在衆口折軸由羣輕君  
子貴同塵安事皎皎明儻在子所呼牛馬亦我名  
不肯埽一室顧欲天下清少日又不羈頗復鄉黨輕長  
年始羞悔耳目尚聰明何須更市藥小女故知名  
春半寒未已今晨天氣清彈冠適新沐搔髮亦良輕但  
愛百鳥樂復憐一窗明千世寧可期歸耕良近名

飲酒二十首同蘓翰林先生次韵追和陶淵明

少賤足可喜險阻更嘗之為親謀斗粟無意出競時緬

馬効一官報國方在茲寧當不卹緯對酒懷憂疑學道  
恨力淺中遭世網持

沈飲非荒宴凜然忽頽山或人欲問事已醉不能言古  
來亦如此名字垂千年但問酒中適豈計飲者傳

陶公羣於人而無人之情詩豈世外語世語不可名東  
坡憐此翁同調但隔生形光來戶屢真處人不驚得酒  
自醒醉放意無虧成

園林日夕好花繁時鳥飛少年玩芳物不飲成坐悲只

今未白髮念昔已依依紛華戰吾道決勝當有歸挫銳  
培其根外槁中匪衰念方終日行輜重安得違

一眼異青白口語來啾喧酌一不酌一用意何其偏誰  
似子孫子高栖蘓門山時隨嶺雲出又與林鳥還平生  
但長嘯獨為嵇生言

高賢衆所懷衆理應取是如何濟衆事難成復易毀功  
成身無與天運亦復爾軒裳役羣愚兒曹眩文綺

庭前兩古柏凌霄燦其英問此誰榮枯雪霜見其情榮

枯何足計有酒還自傾  
熟寐暫展轉覺來一蟬鳴  
歸林但如此便足了平生

功名有天命美好無定姿  
雲夢未足吞聊可巢一枝  
同時金門士文學多瑰奇  
幘被向淮海酣放遽爾為  
車蓋豈不榮野馬不受羈

城東故鹽渠自昔誰所開  
似說全盛時邈焉一長懷  
穿渠引江水此計未為乖  
千帆競莫入集浦如烏栖  
萬疇分白浪嘉稻擢新泥  
恐此太多事且當寄嬉諧  
疏通養

魚鳥花柳共低迷時時載酒往江上亦忘回

大明唐來寺廢苑西南隅青松拱高阜崎嶇有微途肩輿病我阜一馬良可驅衆木媚深壑氣薰時雨餘此馬可數醉何用葺吾居

蘓公士冠冕復似郭有道知士未達間趣操保耆老精鋼試九火勞倦容不槁為州第飲酒況此年歲好藏鋒避世故輕敵喪吾寶時來用毫末勲業自世表

東漢有兩士才智炫一時三公往訪事卧病亦見辭偉

明獨不然小道安取茲斯人似水鏡與世破昏疑憂國  
不為身百世邨可欺舉盃相歡屬是事亦置之

齋居忽若遺不識身與境頗疑酣中似奈爾輒復醒東  
坡自云然挈世一裘領是事吾有師安敢囊出穎指窮  
火已傳豈待得薪炳

安昌漢耆儒樂飲侈亦至東坡儉不固少飲得徑醉愚  
敢効戴崇正復思其次旁通獲親愛公亦安所貴便坐  
時一庖彭宣寧寡味

幼聞錦江春欲訪子雲宅叩門問奇字便埽四方跡青  
雲看一鶚凡毛愧累百勞公諭伯業齒堅頭未白何當  
擺俗累歲月可惋惜

王道無偏黨此語聞諸經高賢如大海亦以衆流成文  
饒歎維州刀鋸人所更相如後私怨此語驚秦庭小人  
慮事疎妄意鹽車鳴安得如江酒洗我塵垢情

淮南夏早收晚秧亦含風連艫似雍絳千斛輸吳中使  
君飲酒樂歲美關梁通安得天下人俱忘楚人弓




十年一麥禾此歲亦難得寄語吾州人不飲良大惑經  
時無死市吏責亦可塞先生門弟子佐守同一國舉盃  
日相屬有句安得默

堂堂門下公英發自初仕卷舒固以時出處不為已朝  
廷登儒輔德禮民有恥岷峨更崢嶸清風在閭里獨醒  
固不惡既醉又可紀成王訪落時百室賦盈止吾儕為  
國謀私愛不足恃

黃子似淵明城市亦復真陳君有道舉化行閭井淳張

侯公瑾流英思春泉新高才更難及淮海一髯秦嗟予  
競何為十駕晞後塵文章不急事用意斯已勤平生不  
共飲歎息無與親問道伯昏室何人獨知津各在天一  
方淚落衣上巾歸休可共隱山中復何人



總校官庶吉士臣張能照  
校對官中書臣張九鐔

謄錄監生臣陳炳